

Na osnovu člana 8. i 19. Zakona o javnim preduzećima (Službene novine FBiH br. 8/05,81/08,22/09, 109/12), člana 257. a u vezi sa članom 303. Zakona o privrednim društvima (Službene novine FBiH, broj 81/15), člana 14. stav (1) Zakona o komunalnim djelatnostima (Službene novine Ze-Do kantona broj 17/08) a u vezi sa članom 8. Odluke o upravljanju grobljem Borik (Službene novine Općine Maglaj broj _____), Nadzorni odbor Komunalnog javnog društva d.o.o. Maglaj donosi sljedeći:

PRAVILNIK O UPRAVLJANJU, ODRŽAVANJU I UREĐENJU GROBLJA BORIK

I – OPĆE ODREDBE

Član 1.

Ovim Pravilnikom se uređuju način i uslovi pod kojima se vrši upravljanje, održavanje i uređenje Groblja Borik, kao i normativi o prostornim i tehničkim uvjetima kod planiranja izgradnje groblja i pratećih građevina.

Član 2.

- (1) Groblje Borik je komunalni objekat u općoj upotrebi, namijenjen za sahranu umrlih, na kojem se nalaze grobna mjesta, prateće građevine i komunalna infrastruktura.
- (2) Groblje Borik obuhvata zemljište koje je aktom Općinskog vijeća Maglaj određeno za sahranjivanje umrlih lica, u skladu sa odgovarajućom prostorno - planskom dokumentacijom.
- (3) Grobno mjesto predstavlja površinu zemljišta određenu za sahranu umrlog lica.
- (4) Slobodno grobno mjesto je grobno mjesto nastalo uređenjem zemljišta za tu namjenu ili napušteno grobno mjesto.
- (5) Napušteno grobno mjesto je grobno mjesto koje je napušteno shodno članu 57. stav (2) Pravilnika, ili grobno mjesto iz kojeg su ekshumirani posmrtni ostatci ili grobno mjesto za koje nije plaćena naknada za održavanje 10 godina.
- (6) Rezervisano grobno mjesto je grobno mjesto za koje je zaključen ugovor o rezervaciji stupio na snagu.
- (7) Grob je grobno mjesto u koje su sahranjeni posmrtni ostaci jednog ili više lica.

Član 3.

Oproštajnim platoom smatra se namjenski izgrađena i uređena površina ispred komemorativnog objekta na gradskom groblju, sa kojeg se vrši ispraćaj umrlih osoba i sa kojeg, nakon obreda, polazi pogrebna povorka.

Član 4.

Pratećim objektima smatra se komemorativni objekat na Groblju sa svim pratećim objektima i sadržajima.

Član 5.

(1) Saobraćajnicama na Groblju Borik smatraju se putevi unutar Groblja koji su svojom širinom predviđeni za promet vozilima u vlasništvu Komunalnog javnog društva d.o.o. Maglaj.

(2) Promet sa vozilima na saobraćajnicama na Groblju Borik od strane trećih lica, izuzev posjetitelja Groblja koji su osobe sa invaliditetom, nije dozvoljeno bez pisanog odobrenja izdatog od strane Komunalnog javnog društva d.o.o. Maglaj.

Član 6.

Pristupnim stazama na Groblju Borik smatraju se pješačke staze, koje svojom širinom nisu predviđene za promet vozilima u vlasništvu Komunalnog javnog društva d.o.o. Maglaj i koje se koriste od strane posjetitelja Groblja Borik.

Član 7.

Komunalnom infrastrukturom na Groblju Borik smatraju se parkovske površine, drenaže i otvoreni kanali, fontane, česme, klupe, korpe za otpatke i slično.

Član 8.

(1) Grobljem Borik upravlja, održava ga i uređuje Komunalno javno preduzeće d.o.o. Maglaj, a na osnovu člana 8. Odluke o upravljanju grobljem Borik Općine Maglaj.

(2) Proširenje Groblja može se vršiti isključivo u skladu sa prostornom i planskom dokumentacijom, te na osnovu prethodnog odobrenja Općinskog Vijeća Maglaj.

(3) Općinsko vijeće Maglaj odlučuje i o stavljanju Groblja Borik ili dijela Groblja Borik trajno van upotrebe, iz prostornih, sanitarnih i drugih opravdanih razloga.

Član 9.

(1) Vršjenja ukopa na dijelu Groblja ili na Groblju od strane Komunalnog javnog društva mogu se privremeno zabraniti uz saglasnost Općinskog vijeća Maglaj, uslijed elementarnih nepogoda, više sile ili izvođenja pojedinih građevinskih i drugih radova koji zahtijevaju obustavu ukopa.

(2) Ukop će se zabraniti iz sanitarnih razloga, na zahtjev općinskog organa nadležnog za sanitarne poslove.

(3) Komunalno javno društvo d.o.o. Maglaj može privremeno zabraniti vršenje ukopa na Groblju Borik ili na njegovom dijelu i iz drugih opravdanih razloga, o čemu u svakom konkretnom slučaju odlučuje Komunalno javno društvo d.o.o. Maglaj, uz saglasnost Općinskog vijeća Maglaj.

Član 10.

Komunalno javno društvo d.o.o. Maglaj će obustaviti sahranjivanje u grobno mjesto/grobnicu u slučaju spora o pravu ukopa, odnosno korištenja grobnog mjesta/grobnice sve dok spor ne bude pravosnažno riješen od strane nadležnog organa ili institucije.

Član 11.

Upravljanje Grobljem Borik podrazumijeva:

- Uređenje i održavanje Groblja Borik
- Održavanje reda na Groblju Borik
- Dodjelu grobnih mjesta na korištenje,
- Utvrđivanje i naplatu naknade za dodjelu grobnih mjesta na korištenje,
- Vođenje propisanih evidencija
- Propisivanje režima rada, kao i drugih uslova upravljanja Grobljem Borik, u skladu sa zakonskim i podzakonskim propisima.

II – UREĐIVANJE I ODRŽAVANJE GROBLJA BORIK

Član 12.

(1) Groblje Borik je podijeljeno na grobna polja , a ona na redove u kojima se raspoređuju grobovi u skladu sa planom uređenja Groblja.

(2) Broj grobnih mjesta se može mijenjati samo u izuzetnim slučajevima, i to isključivo na osnovu odgovarajućeg akta iz nadležnosti Uprave Komunalnog javnog društva d.o.o. Maglaj.

Član 13.

Zemljištem namijenjenim za sahranjivanje smatra se zemljište za ukop umrlih osoba.

Član 14.

(1) Groblje Borik je podijeljeno na:

- a) zemljište za ukop umrlih osoba pravoslavne vjeroispovijesti
- b) zemljište za ukop umrlih osoba katoličke vjeroispovijesti
- c) zemljište za ukop umrlih osoba islamske vjeroispovijesti
- d) zemljište sa tzv. mješovitim grobnim mjestima.

(2) Groblje je podjeljeno na grobne parcele koje su pojedinačno označene sa odgovarajućom numeričkom oznakom , ispred koje se upisuje oznaka :

- „Umrle osobe pravoslavne vjeroispovijesti“ za osobe koje se sahranjuju na zemljištu iz stava (1) tačka a) ovog člana
- „Umrle osobe katoličke vjeroispovijesti“ – za osobe koje se sahranjuju na zemljištu iz stava (1) tačka b) ovog člana
- "Umrle osobe islamske vjeroispovijesti“ – za osobe koje se sahranjuju na na zemljištu iz stava (1) tačka c) ovog člana
- „Mješovita grobna mjesta“ – za umrle osobe koje se sahranjuju na zemljištu sa tzv. mješovitim grobnim mjestima, koje je namijenjeno za ukop umrlih osoba koje se ne žele ili ne mogu sahraniti u jednom od prethodno određenih zemljišta iz stava (1) ovog člana (npr. za lica različitih vjeroispovijesti koja su za života izrazila želju da budu sahranjena jedno pored drugog, agnostike, ateiste, nepoznate osobe i slično).

Član 15.

(1) Grobne parcele se označavaju numeričkim oznakama , kako slijedi:

- 1 – za grobne parcele za ukop umrlih osoba pravoslavne vjeroispovijesti,
- 2 – za grobne parcele za ukop umrlih osoba katoličke vjeroispovijesti,
- 3 – za grobne parcele za ukop umrlih osoba islamske vjeroispovijesti,
- 4 – za grobne parcele za ukop umrlih koji se sahranjuju u tzv. mješovitom dijelu groblja.

(2) Ispred numeričkih oznaka se upisuje oznaka, na način kako je to određeno u stavu (2) člana 14. ovog Pravilnika.

(3) Komunalno javno društvo d.o.o. Maglaj će , u slučaju formiranja novih grobnih parcela, za iste odrediti nove numeričke oznake.

Član 16.

(1) Neto dimenzija „zemljanog“ grobnog mjesta jeste veličina same grobne jame – mezara, koja iznosi 80x210 cm i dubine je 130 cm.

(2) Bruto dimenzija „zemljanog“ grobnog mjesta se povećava za 25 cm sa bočnih strana i za 30 cm sa gornje i donje strane grobnog mjesta, tako da najmanja udaljenost između dva grobna mjesta sa bočnih strana iznosi 50 cm, a sa gornje i donje strane po 60 cm.

Član 17.

(1) Umrle osobe se na Groblju Borik, izuzev u „zemljanim“ grobnim mjestima, mogu sahranjivati i u grobnicama.

(2) Grobnice moraju biti izgrađene od betona.

Član 18.

Neto dimenzija grobnice je veličine grobnice unutar zidova i u jednom stupcu iznosi najmanje 80x210, u dva stupca 180x210, a u tri stupca najmanje 280x210 cm.

Član 19.

(1) Debljina zidova grobnice iznosi minimalno 12 cm.

(2) Dubina grobnice, u jednom stupcu, za jednu umrlu osobu iznosi najmanje 130 cm, za dvije umrle osobe najmanje 190 cm, za tri umrle osobe najmanje 250 cm.

Član 20.

Bruto dimenzija grobnice se povećava za 25 cm sa bočnih strana i za 30 cm sa gornje i donje strane grobnice, tako da najmanja udaljenost između dvije grobnice sa bočnih strana iznosi 50 cm, a sa gornje i donje strane 60 cm.

Član 21.

(1) Grobna mjesta, odnosno grobnice mogu biti odvojene (pojedinačne), povezane-duple i etažne (porodične grobnice).

- (2) Iskop grobnog mjesta se obavlja ručno.
- (3) Iskop se može vršiti djelimično i mašinski, ukoliko je moguć pristup mehanizacije do grobnog mjesta.
- (4) Komunalno javno društvo d.o.o. Maglaj će odobriti sahranjivanje dvije ili više umrlih osoba u isti grob (duplo ili trojno ukopavanje), ako takvu sahranu zahtjeva ovlaštena osoba i ako to terenski uslovi omogućavaju.
- (5) Ovlaštene osobe iz stava (4) ovog člana su:
 - a) roditelji/usvojitelji
 - b) bračni/vanbračni drug
 - c) djeca
 - d) braća i sestre.

Član 22.

- (1) Pravo na ukop na Groblju Borik ima osoba koja je umrla na području općine Maglaj i osoba koja je na području općine Maglaj imala svoje posljednje prebivalište ili boravište.
- (2) Izuzetno, pravo na ukop na Groblju Borik ima i osoba čija porodica, odnosno lice koje se stara o njenom ukopu, to zahtijeva, ako je umrla osoba u trenutku rođenja imala svoje prebivalište na području općine Maglaj, pod uslovom da je podnosilac zahtjeva (član porodice ili lice koje se stara o njenom ukopu) lice koje ima svoje posljednje prebivalište/boravište na području općine Maglaj.
- (3) Pravo na ukop na Groblju Borik imaju i druge osobe koje nisu umrle na području općine Maglaj, niti su imale posljednje prebivalište i boravište na području općine Maglaju, ukoliko su korisnici porodičnih grobnica.

Član 23.

- (1) O podizanju nadgrobnih spomenika na Groblju Borik odlučuje Komunalno javno društvo d.o.o. Maglaj, na pisani zahtjev podnosioca, uz koji se prilaže idejna skica ili fotografija.
- (2) Nadgrobnni spomenici mogu se podizati samo na osnovu pisanog odobrenja Komunalnog javnog društva d.o.o. Maglaj.
- (3) Nadgrobnni spomenici mogu se izrađivati od svih vrsta trajnih materijala.
- (4) Dimenzije spomenika ne smiju prelaziti okvir grobnog mjesta, odnosno grobnice, i isti treba da se uklapaju u estetski izgled okoline.
- (5) Natpisi na nadgrobnim spomenicima ne smiju vrijeđati ničije nacionalne, vjerske ili moralne osjećaje, niti na bilo koji način povrijeđivati uspomenu na umrlog.

Član 24.

Za postavljanje, popravljanje ili uklanjanje spomenika i drugih predmeta na grobovima i grobnicama potrebno je pisano odobrenje Komunalnog javnog društva d.o.o. Maglaj.

Član 25.

- (1) Redovno održavanje Groblja vrši se na osnovu programa održavanja javnih zelenih površina.
- (2) Redovno održavanje Groblja Borik podrazumijeva:
 - infrastrukturna ulaganja u privođenje namjeni površina kojim je izvršeno proširenje Groblja
 - održavanje drveća
 - održavanje grmlja
 - održavanje cvijeća
 - održavanje travnjaka,

- zimsko održavanje (sprječavanje poledice, čišćenje snijega),
- ostale poslove održavanja (odvoz smeća, pranje saobraćajnica i oprostajnog platoa, farbanje, čišćenje drenažnih , kanalizacionih i bujičnih kanala i odvoda i sl.).

(3) Redovno održavanje Groblja Borik se finansira iz sredstava za obavljanje komunalnih djelatnosti koja se osiguravaju iz budžeta osnivača Komunalnog javnog društva d.o.o. Maglaj , a koja se osiguravaju od prihoda ostvarenih od komunalnih usluga iz segmenta zajedničke komunalne potrošnje.

Član 26.

(1) Komunalno javno društvo d.o.o. Maglaj je u obavezi održavati Gradsko Groblje u skladu sa urbanističkim i sanitarnim propisima , godišnjim planovima/programima, kao i estetskim zahtjevima, pri čemu treba voditi računa o zaštiti okoliša.

(2) Groblje mora biti uređeno na parkovski način.

Član 27.

Komunalno javno društvo d.o.o. Maglaj dužno je na pogodnim mjestima osigurati pravilno odlaganje otpada, ostatka vijenaca i slično, te odvoz i uklanjanje istih, u skladu sa zakonskim i podzakonskim propisima.

Član 28.

Groblje i njegova površina namijenjena za buduće sahranjivanje mora biti ispresijecana dovoljno širokim i uredno održanim stazama, tako da bude omogućen nesmetan pristup, kako još nepopunjenim grobnim mjestima, tako i postojećim grobovima i grobnicama.

Član 29.

Periferne i druge slobodne površine groblja treba ozelenjeti pogodnim nasadima i travom, a površine koje se još ne koriste za sahranjivanje, ozelenjeti travom.

Član 30.

(1) Pored održavanja i uređivanja Groblja Borik koje obavlja Komunalno javno društvo d.o.o. Maglaj, o uređenju dodijeljenih mjesta mogu se brinuti korisnici ili druge osobe koje na taj način čuvaju pijetet prema umrloj osobi, a odnose se na sadnju cvijeća, pljevljenje trave ili korova, čišćenje nadgrobnog spomenika i slično.

(2) Sadnja grmolikih ili drvenastih biljaka, kao i postavljanje ograda, stolova, klupa ili nadstrešnica na dodijeljenim grobnim mjestima nije dozvoljena bez prethodne saglasnosti Komunalnog javnog društva d.o.o. Maglaj.

(3) Grobna mjesta koja se uređuju u skladu sa stavom (1) ovog člana moraju se uređivati na takav način da se pri tome ne oštete okolna grobna mjesta.

Član 31.

Vjerske zajednice prilikom ukopa umrle osobe mogu obavljati vjerske obrede, u skladu sa propisima o vjerskim zajednicama.

III – RED NA GROBLJU BORIK

Član 32.

Na Groblju Borik zabranjeno je vršenje aktivnosti određenih članom 58. Odluke o upravljanju Grobljem Borik.

Član 33.

(1) Za vršenje zanatskih i drugih uslužnih radova na Groblju važe, pored opštih propisa, sljedeće odredbe:

- zanatski i drugi uslužni radovi ne mogu se obavljati bez saglasnosti Komunalnog javnog društva d.o.o. Maglaj
- građevinski materijal (pijesak, šljunak, kreč, cement i dr.) dozvoljeno je držati na Groblju samo za ono vrijeme koje je potrebno z izvršavanje radova, vodeći pri tome računa da ne ometa saobraćaj, a izvođač radova je dužan da odmah po završetku istih radilište dovede u prvobitno stanje
- ako se prilikom izvođenja radova pronađu dijelovi kovčega, kosti i slično, izvođač radova je dužan odmah prijaviti Komunalnom javnom preduzeću d.o.o. Maglaj i ako Komunalno javno preduzeće d.o.o. Maglaj ne odredi drugačije, dužan ih je odmah zakopati na istom mjestu
- ako se prilikom izvođenja radova pronađu predmeti od vrijednosti, izvođač radova dužan ih je odmah predati Komunalnom javnom društvu d.o.o. Maglaj.

(2) Prije izdavanja pisane saglasnosti iz stava (1) ovog člana , podnosilac zahtjeva za izvođenje radova na dodijeljenim grobnim mjestima obavezan je priložiti:

- dokaz da je izvođač radova registrovan od strane nadležnog organa za obavljanje takve djelatnosti
- tehnički crtež sa svim potrebnim dimenzijama i elementima radova koji se namjeravaju izvoditi
- dokaz o uplaćenju naknadi za izvođenje radova na Groblju Borik u skladu sa cjenovnikom Komunalnog javnog društva d.o.o. Maglaj.

Član 34.

(1) Na Groblju Borik zabranjeno je prodavati bilo kakvu robu bez odobrenja Komunalnog javnog društva d.o.o. Maglaj.

(2) Prodaja je dozvoljena samo u za to određenim prostorijama.

Član 35.

Na Groblju Borik zabranjeno je održavanje skupova, osim skupova koji su u uskoj vezi sa prirodom i namjenom Groblja, kao što su ispraćaji, komemoracije, sahrane i vjerski obredi u skladu sa propisima vjerskih zajednica.

Član 36.

Groblje Borik treba biti čvrsto ograđeno, i to naročito sa onih strana gdje bilo kakvi limitirajući slučajevi onemogućavaju dalje širenje Groblja, a ukoliko to nije slučaj, mogu se postavljati privremene barijere, koje se u slučaju širenja Groblja na okolne zemljišne parcele, mogu privremeno ili trajno ukloniti.

Član 37.

Komunalno javno društvo d.o.o. Maglaj ne odgovara za štete nastale na Groblju koje prouzrokuju treće i nepoznate osobe (krađa, vandalizam, izvođenje radova u blizini grobnih mjesta i slično).

Član 38.

Oštećenja grobova, grobnica i nadgrobnih spomenika Komunalno javno društvo d.o.o. Maglaj će odmah prijaviti nadležnim organima i o tome obavijestiti zainteresovana lica.

Član 39.

(1) Komunalno javno društvo d.o.o. Maglaj dužno je preuzeti nađene, izgubljene ili zaboravljene predmete na groblju i o istim izdati potvrdu o prijemu.

(2) Nađene predmete će Komunalno javno društvo d.o.o. Maglaj vratiti vlasniku, ako je on poznat, a ako nije poznat, sa nađenim predmetom postupiće se na propisan način.

Član 40.

Komunalno javno društvo d.o.o. Maglaj je dužno internim aktom odrediti vrijeme u kojem je otvoreno Groblje za posjetioce i vrijeme kada se mogu vršiti sahrane i drugi dozvoljeni radovi na Groblju.

Član 41.

Urednu objavu o vremenu dozvoljenih ulazaka na Groblje, Komunalno javno društvo d.o.o. Maglaj dužno je istaći na ulazu u Groblje.

Član 42.

(1) Izuzetno, iz opravdanih razloga, Komunalno javno društvo d.o.o. Maglaj može skratiti vrijeme iz člana 40. ovog Pravilnika, ili potpuno zabraniti pristup posjetiocima na cijelom Groblju ili pojedinim dijelovima Groblja, ali je o tome prethodno , na najpogodniji način, dužno obavijestiti javnost.

(2) Ograničenje iz prethodnog stava ovog člana mogu trajati samo do otklanjanja smetnji koje su ga izazvale i ne mogu se odnositi na sahranjivanje i pogrebne obrede.

Član 43.

Djeca mlađa od 10 godina mogu ulaziti u Groblje samo u pratnji punoljetnih lica.

IV – RASPOLAGANJE SLOBODNIM GROBNIM MJESTOM

Član 44.

(1) Slobodnim grobnim mjestom raspolaže Komunalno javno društvo d.o.o. Maglaj.

(2) Slobodno grobno mjesto može se dodijeliti po potrebi i po zahtjevu.

Član 45.

Umrla osoba se, po pravilu, sahranjuje po tzv. „redu kopanja“, odnosno u grobnom mjestu na zemljištu namijenjenom za sahranjivanje u skladu sa odredbama člana 14. Pravilnika, izuzev kada za određeno grobno mjesto lice ima zaključen ugovor o rezervaciji, ili ga je drugo lice u njeno ime, a za svoj račun zaključilo.

Član 46.

(1) Kada nastupi smrt i utvrdi se da osoba nema rezervisano grobno mjesto, Komunalno javno društvo d.o.o. Maglaj će na osnovu zahtjeva od strane članova porodice ili druge opunomoćene osobe dodijeliti grobno mjesto predviđeno za redovan ukop.

(2) Podnošenjem zahtjeva od strane članova porodice ili druge opunomoćene osobe da se umrli sahrani na Groblju Borik, Komunalno javno preduzeće d.o.o. Maglaj, uz naknadu, daje grobno mjesto na korištenje, te o tome donosi odgovarajuće rješenje.

(3) Podnosilac zahtjeva iz stava (1) ovog člana ujedno je i obveznik plaćanja naknade za održavanje grobnog mjesta.

Član 47.

(1) Nepoznate osobe ukopati će se na Groblju na način uobičajen mjesnim prilikama, osiguravajući pri tome pristupne podatke o nepoznatim osobama (dob, spol, datum smrti) u tzv. mješovito grobno mjesto.

(2) Ukop nepoznatih osoba vrši se po nalogu nadležnog tužioca.

V – REZERVACIJE GROBNIH MJESTA NA GRADSKOM GROBLJU

Član 48.

Korisnik komunalne usluge je osoba koja sa Komunalnim javnim društvom d.o.o. Maglaj ugovara korištenje komunalne usluge, a koja ne mora ujedno biti i korisnik grobnog mjesta.

Član 49.

Korisnik grobnog mjesta je osoba kojoj je grobno mjesto dato na korištenje ili je na drugi način stekla pravo korištenja u skladu sa važećim propisima.

Član 50.

(1) Naručitelj izgradnje grobnice se smatra korisnikom grobnice i pravo ukopa u grobnici imaju samo članovi porodice korisnika, odnosno njegovi nasljednici.

(2) Pravo ukopa mogu imati i treće osobe ukoliko ih je korisnik grobnice za života opunomoćio da se sahrane u grobnici i koje u pisanom obliku prihvate takvu punomoć.

(3) Nakon smrti korisnika grobnice, pravo korištenja stiču njegovi nasljednici.

Član 51.

Grobna mjesta na Groblju Borik mogu se rezervisati.

Član 52.

(1) Pravo na rezervaciju grobnog mjesta stiče osoba koja je za života podnijela pisani zahtjev i sa Komunalnim javnim preduzećem d.o.o. Maglaj zaključila ugovor o rezervaciji grobnog mjesta na Groblju Borik, ili je to učinio neko drugi u njeno ime, a za svoj račun.

(2) Prenos stečenih prava na treću osobu nije dozvoljen bez prethodne saglasnosti Komunalnog javnog društva d.o.o. Maglaj i provođenja procedure prenosa stečenih prava.

Član 53.

(1) Ugovor o rezervaciji grobnog mjesta na Groblju Borik jeste formalna dvostrana izjava volje između Komunalnog javnog društva d.o.o. Maglaj i osobe koja u svoje ime ili u tuđe ime, a za svoj račun, nakon zaključenja i plaćanja ugovorene cijene, stiče pravo na rezervaciju grobnog mjesta na Groblju Borik.

(2) Sticanje prava iz stava (1) ovog člana isključivo se odnosi na obavezu Komunalnog javnog društva d.o.o. Maglaj da u slučaju smrti druge ugovorne strane ili smrti osobe u čije ime je druga ugovorna strana zaključila ugovor o rezervaciji grobnog mjesta, osigura da se sahrana posmrtnih ostataka obavi isključivo u grobnom mjestu za koje je zaključen ugovor o rezervaciji grobnog mjesta na Groblju Borik.

Član 54.

Ugovor o rezervaciji grobnog mjesta obavezno sadrži pravnu odredbu kojom se definiše da li je druga strana zaključila ugovor o rezervaciji grobnog mjesta na Groblju Borik za slučaj svoje smrti ili za slučaj smrti neke druge osobe.

Član 55.

(1) Ugovor o rezervaciji se zaključuje na period od 10 godina.

(2) Vremensko razdoblje iz stava (1) ovog člana može se ugovoriti i na razdoblje duže od 10 godina, s tim da se vremensko trajanje uvijek odnosi na dodatnih 5 godina.

Član 56.

Ugovor o rezervaciji grobnog mjesta se može obnoviti (produžiti) ukoliko to zahtijeva druga ugovorna strana prije ili nakon isteka razdoblja iz člana 55. ovog Pravilnika, odnosno prije ili nakon razdoblja na koji je zaključen.

Član 57.

(1) Komunalno javno društvo d.o.o. Maglaj dužno je pritrpiti vremenski priček u odnosu na datum isteka ugovora iz člana 55. ovog Pravilnika u trajanju od 30 dana, u kojem roku će se druga strana pisano upozoriti na pravne posljedice neobnavljanja ugovora.

(2) Ukoliko druga ugovorna strana u tom roku ne obnovi (produži) ugovor o rezervaciji grobnog mjesta, grobno mjesto za koje je bio zaključen ugovor o rezervaciji smatra se napuštenim, odnosno slobodnim i Komunalno javno društvo d.o.o. Maglaj može za takvo grobno mjesto zaključiti ugovor o rezervaciji sa trećom osobom.

Član 58.

Nastupanje smrti prije isteka važenja ugovora o rezervaciji grobnog mjesta ili otkazivanje rezervacije nakon zaključenja ugovora i plaćanja ugovorene naknade na Groblju Borik ne proizvodi pravno dejstvo kojim je Komunalno javno društvo d.o.o. Maglaj obavezno izvršiti povrat razlike ugovorene cijene za ugovoreno razdoblje.

VI – ISKOPI UMRLIH, ODNOSNO NJIHOVIH POSMRTNIH OSTATAKA

Član 59.

(1) Iskop umrlih, odnosno njihovih posmrtnih ostataka (ekshumacija) , može se vršiti na zahtjev članova porodice umrlog, po službenoj dužnosti kada za to postoje opravdani razlozi i po odluci suda.

(2) Iskop se može izvršiti samo na osnovu odobrenja općinskog organa nadležnog za sanitarne poslove.

(3) Ekshumacija i prijenos posmrtnih ostataka vrši se na način i pod uslovima koji onemogućavaju širenje zaraze.

VII – VOĐENJE EVIDENCIJA O UPRAVLJANJU GRADSKIM GROBLJEM

Član 60.

Komunalno javno društvo d.o.o. Maglaj je obavezno voditi evidencije o upravljanju Grobljem Borik.

Član 61.

Evidencije o upravljanju Grobljem Borik dijele se na stalne i povremene.

Član 62.

Stalna evidencija o sahranjenim osobama jeste registar umrlih osoba po prezimenu, imenu i imenu oca, jedinstvenom matičnom broju građana umrle osobe, sa upisivanjem podataka o mjestu ukopa u smislu oznaka utvrđenih odredbama iz člana 14. i 15. ovog Pravilnika, u koje se upisuje i podatak na čiji trošak su sahranjene, kao i ukoliko je izvršena ekshumacija, upisuje se vrijeme obavljanja iste i na čiji zahtjev je izvršena.

Član 63.

Povremene evidencije o upravljanju gradskim grobljem su podložne izmjenama i obuhvataju evidencije o rezervisanim grobnim mjestima i evidencije o fizičkim osobama – korisnicima, koji su obveznici plaćanja naknade za održavanje Groblja Borik.

VIII – ZAVRŠNE ODREDBE

Član 64.

Izmjene i dopune ovog Pravilnika vrše se na način predviđen za njegovo donošenje.

Član 65.

Komunalno javno društvo će o utvrđivanju cijena pogrebnih usluga donijeti posebnu odluku, na koju saglasnost daje Općinsko vijeće Maglaj.


Član 66.

Ovaj Pravilnik stupa na snagu danom objave u Službenim novinama Općine Maglaj.

Broj: NO- 10/21

Datum: 08.06.2021. godine

PREDSJEDNIK NAZORNOG ODBORA
KOMUNALNOG JAVNOG DRUŠTVA D.O.O. MAGLAJ



The image shows a handwritten signature in black ink over a circular official stamp. The stamp contains the text 'KOMUNALNO JAVNO DRUŠTVO D.O.O. MAGLAJ' around the perimeter and 'Maglaj' in the center.